

NACRT

Na osnovu člana 11. Zakona o ugostiteljskoj djelatnosti ("Službene novine Federacije BiH", broj:32/09), člana 14. Zakona o turističkoj djelatnosti ("Službene novine Federacije BiH", broj: 32/09), člana 34., stav 2. Zakona o obrtu i srodnim djelatnostima u Federaciji Bosne i Hercegovine ("Službene novine Federacije BiH", broj: 75/21), člana 24. Zakona o unutrašnjoj trgovini ("Službene novine Federacije BiH", broj 40/10 i 79/17), člana 27. Zakona o zaštiti od buke ("Službene novine Federacije BiH" broj 110/12); člana 12, Zakona o zaštiti od buke ("Službene novine SBK/KSB" br. 11/00) i članka 91. Statuta općine Travnik ("Službene novine općine Travnik", broj 11/05), Općinsko vijeće Travnik, na sjednici održanoj dana _____ godine, **d o n o s i**

ODLUKU O RADNOM VREMENU NA PODRUČJU OPĆINE TRAVNIK

I OPĆE ODREDBE

Član 1.

Ovom Odlukom utvrđuje se radno vrijeme, početak i završetak radnog vremena na području općine Travnik u oblasti trgovine, ugostiteljstva, turizma, obrtništva i srodnih djelatnosti.

Odredbe iz stava 1. ovog člana odnose se na pravna i fizička lica koja obavljaju navedene djelatnosti putem svojih trgovinskih, obrtničkih, turističkih i ugostiteljskih radnji, agencija, poslovnih jedinica, radionica i sličnih prostora koji se nalaze na području općine Travnik, a čiji je početak i završetak radnog vremena od općeg interesa.

Član 2.

Odredbe ove Odluke se ne primjenjuju na poslovne jedinice i radnje koje pružaju ugostiteljske usluge uposlenim u preduzećima, organizacijama, udruženjima i ustanovama.

Član 3.

Pod radnim vremenom u smislu odredaba ove Odluke smatra se radno vrijeme u kojem poslovni subjekti iz člana 1. ove Odluke mogu biti otvoreni, vršiti i pružati usluge građanima u skladu sa svojim predmetom poslovanja.

Član 4.

Trgovine, ugostiteljski i turistički objekti, obrtničke i srodne djelatnosti posluju najmanje 6 dana u sedmici, ako ovom Odlukom nije drugačije određeno.

Radno vrijeme traje najmanje 7 sati dnevno i utvrđuje se u intervalu od 06,00 do 24 sata u ljetnom periodu računanja vremena, odnosno od 06.00 sati do 23.00 sata u zimskom periodu računanja vremena, izuzev onih djelatnosti koje stvaraju buku i ometaju noćni mir i odmor u naseljenim mjestima i objektima zajedničkog stanovanja, kada se radno vrijeme određuje od 06 do 22 sata.

Izuzetno, ako to zahtijevaju potrebe građana, načelnik Općine utvrđuje obavezu i raspored rada subjekata iz člana 1. ove Odluke u dane državnih i vjerskih praznika i nedjeljom.

Raspored radnog vremena poslovnih subjekata mora biti istaknut na vidnom mjestu na ulazu u poslovne prostorije, a lica zaposlena u oblastima iz stava 1, člana 1 ove Odluke dužna su da se pridržavaju istaknutog radnog vremena.

II POSEBNE ODREDBE

Član 5.

Radno vrijeme u oblasti trgovine

Radno vrijeme trgovinskih objekata u kojima se obavlja trgovina i trgovinske usluge, može trajati od 06 do 22 sata svakog dana u sedmici.

Izuzetno, radno vrijeme benzinskih pumpi može trajati od 00 – 24 sata.
Prodavnice tipa dragstor moraju biti otvorene neprekidno od 00 – 24 sata.
Odredbe iz stava 1 ovog člana, odnose se i na radno vrijeme apoteke, s tim što je Javna ustanova Apoteke Travnik, dužna osigurati radno vrijeme od 00 do 24 sata.

Odredbe iz stava 1 ovog člana, odnose se i na prodajni dio pekara koje u svom sastavu osim proizvodnog imaju i prodajni dio.

Radno vrijeme tržnica može se odrediti svakim danom, i to u periodu zimskog računanja vremena od 07 do 18, a u periodu ljetnog računanja vremena od 07 do 19 sati.

Član 6.

Radno vrijeme u oblasti obrta

Objekti u kojim se obavljaju obrti i obrtu srodne djelatnosti na području Općine Travnik, mogu poslovati svakim danom od 07 do 22 sata.

Izuzetno od odredbi iz prethodnog stava, objekti u kojima se obavlja proizvodnja pekarskih proizvoda mogu raditi od 00 – 24 sata.

Član 7.

Radno vrijeme ugostiteljskih objekata

U zavisnosti od vrste ugostiteljskih objekata i pod uslovom da nivo buke od korištenja akustičnih uređaja ne prelazi Zakonom o zaštiti od buke, dozvoljeni nivo Leq 80 dB (A), odnosno u diskotekama do Leq 100 dB(A), radno vrijeme istih može trajati:

- Hoteli, moteli, pansioni, prenoćišta i drugi objekti koji pružaju usluge smještaja i to odjel recepcije od 00 do 24 sata,
- Disko barovi i disko klubovi od 19 – 24 sata,
- Noćni barovi i noćni klubovi od 20 do 03 sata,
- Saloni za posebne prilike (svadbeni saloni) izvan naseljenog mjesta od 12 do 03 sata,
- Ostali ugostiteljski objekti u naseljenom i izvan naseljenog mjesta od 06 do 23 sata u zimskom periodu, od 06 do 24 sata u ljetnom periodu, s tim da se u dane državnih i vjerskih praznika radno vrijeme može produžiti do 01 sat uz prethodno pribavljenu saglasnost načelnika Općine.

Član 8.

Ugostiteljski objekti smješteni u objektima autobusne stanice i benzinskih pumpnih stanica, mogu raditi u radnom vremenu objekata u kojima se nalaze uz uslov da se u toku rada ugostiteljskog objekta ne remeti javni red i mir.

Za vrijeme turističke sezone u zimskom periodu na području Babanovca (od 22.12 do 28.02.) određuje se radno vrijeme najduže do 01 sat uz emitovanje muzike samo u zatvorenom prostoru.

Član 9.

U skladu sa Zakonom o zaštiti od buke u svim ugostiteljskim objektima iz člana 7 i 8 ove odluke nije dozvoljena reprodukcija muzike ukoliko ima čujnost izvan zatvorenog objekta u kome se izvodi ili emituje i koja bi ometala noćni mir i odmor u naseljenim mjestima u periodu od 22 do 06 sati idućeg dana.

U svim ugostiteljskim objektima zabranjeno je reprodukcija muzike na dan 11.07. svake godine.

Za vrijeme održavanja manifestacija i koncerata na otvorenom određuje se radno vrijeme do 01 sat. Izuzetno u dane državnih i vjerskih praznika, ili u dane proslave lokalnog značaja za neko područje općine, proslave matura, 8. marta, Valentinova, ugostiteljski objekti u kojima se organizuju prigodne svečanosti i zabave, mogu poslovati i duže od propisanog vremena, a najduže do 02 sata, uz prethodno pribavljenu saglasnost načelnika Općine.

Član 10.

Ugostitelj u čijem objektu se organizuje prigodna svečanost obavezan je zahtjev za produženo radno vrijeme sa popratnom dokumentacijom podnijeti najkasnije 15 dana prije održavanja svečanosti, uz uslov da se u prethodnom periodu od 6 mjeseci nije narušavao javni red i mir u tom objektu.

Za izdavanje saglasnosti uz zahtjev za produženo radno vrijeme, ugostitelj je dužan priložiti uvjerenje poreske uprave o izmirenim poreskim obavezama ne starije od 3 mjeseca, a informaciju PS Travnik da u posljednjih 6 mjeseci u ugostiteljskom objektu nije bilo narušavanja javnog reda i mira, sa podacima iz RNK baze da li ima neplaćenih kazni do zadnjih mjesec dana po osnovama narušavanja javnog reda i mira vezanih za ugostiteljski objekat i zbog nepoštivanja općinskih odluka, organ će pribaviti po službenoj dužnosti.

Saglasnost iz prethodnog stava izdaje se na određeno vrijeme i isto se može odnositi na najviše dva praznika, ako se oba obilježavaju u vremenskom okviru od 30 dana.

III KAZNE NE ODREDBE

Član 11.

Novčanom kaznom u iznosu od 1.000,00 KM do 2.000,00 KM kaznit će se za prekršaj pravno lice i vlasnik radnje ako:

- Ako odredi radno vrijeme suprotno odredbama ove Odluke, član 5., 6., 7. i 8. ove Odluke.
- Na propisan način ne istakne obavijest o radnom vremenu član 4., stav 4. ove Odluke.
- Ako se ne pridržava istaknutog radnog vremena član 4., stav 4. ove Odluke.
- Emituje muziku poslije 22 sata ako ima čujnost izvan zatvorenog objekta član 9., stav 1. ove Odluke.

Za prekršaj iz stava 1 ovog člana, kaznit će se odgovorno lice u pravnom licu, novčanom kaznom u iznosu od 500,00 KM do 1.000,00 KM.

IV NADZOR

Član 12.

Nadzor nad sprovođenjem ove odluke vrši kantonalni organ uprave nadležan za poslove turističko-ugostiteljske inspekcije i tržišne inspekcije i Policijska stanica Travnik, svako u okviru svoje nadležnosti.

V PRIJELAZNE I ZAVRŠNE ODREDBE

Član 13.

Pravna i fizička lica dužna su da svoje radno vrijeme usklade sa odredbama ove Odluke u roku od 30 dana od dana njenog stupanja na snagu.

Članak 14.

Danom stupanja na snagu ove Odluke, prestaje da važi Odluka o radnom vremenu na području općine Travnik („Službene novine Općine Travnik“, broj 7/2017, 14/2019, 23/21 i 5/22).

Članak 15.

Ova Odluka stupa na snagu narednog dana od dana objavljivanja u "Službenim novinama Općine Travnik".

Broj:
Datum: godine

T r a v n i k

PREDSJEDAVAJUĆA
OPĆINSKOG VIJEĆA TRAVNIK

Vlatka Lovrinović, dipl.teolog,s.r.

**OBRAZLOŽENJE UZ
O D L U K U
o radnom vremenu na području općine Travnik**

Obzirom da je Odluka o radnom vremenu Općine Travnik već pretrpjela tri izmjene uglavnom u članu 6, Služba predlaže novu Odluku kojom se ranija odluka i njene izmjene („Službene novine Općine Travnik“, broj 7/2017, 14/2019, 23/21 i 5/22) stavljaju van snage.

Obzirom da je Zakon o unutrašnjoj trgovini izmjenjen (Sl. novine FBiH, br: 40/10 i 79/17) i da je stupio na snagu Zakon o obrtu i srodnim djelatnostima u Federaciji Bosne i Hercegovine ("Službene novine Federacije BiH", broj: 75/21), ovim Prijedlogom Odluka o radnom vremenu se usklađuje sa navedenim Zakonima, kao i sa Zakonom o zaštiti od buke ("Službene novine Federacije BiH" broj 110/12) i Zakonom o zaštiti od buke ("Službene novine SBK/KSB" br. 11/00).

PRILOG:

- fotokopija Odluke o radnom vremenu („Službene novine Općine Travnik“, broj 7/2017),
- fotokopija Odluke o izmjenama i dopunama Odluke o radnom vremenu („Službene novine Općine Travnik“, broj 14/2019) i
- fotokopija Odluke o izmjenama i dopunama Odluke o radnom vremenu („Službene novine Općine Travnik“, broj 23/2021).
- fotokopija Odluke o izmjenama i dopunama Odluke o radnom vremenu („Službene novine Općine Travnik“ 5/22)

Obradila: Željka Frljić, dipl.iur.

POMOĆNIK NAČELNIKA

Amira Delilbašić, dipl.ecc.